

解州全志卷之十一 安邑縣

古蹟

北安邑故郡

北魏志二漢晉曰安邑屬河東後改太和十一年置為郡隋開皇初廢

故虞州

舊唐志安邑隋為虞州郭下置安邑縣正觀十七年州廢

古城

在縣城西一里魏文侯所築東西兩壘對峙韓信

解州全志

卷之十一

安邑縣

古蹟

一

虜魏豹於此亦名魏豹城

蚩尤城

在鹽池東南二里許黃帝經序黃帝殺蚩尤其血化為鹵今之解池是也詳見運城志

鳴條陌

帝王世紀安邑縣西有鳴條陌書序湯升自陶遂戰於鳴條之野蔡氏曰陌在河曲之陽鳴條在安邑之西

虞坂

縣南二十里中條山俗名青石槽水經注虞城北

對長坂二十里謂之虞坂戴延之曰自上及下七  
山相重卽騏驥逢伯樂處南通平陸北在安邑境  
內

段干木舊隱

在段村有元人段禧碑記按段干木又稱芮人兩  
存之

韓信城

在縣城南五里信屯兵處

韓信溝

在信城北西自古城東達湯里邑先四圍皆水豹

解州全志

卷之十一

安邑縣 古蹟

二

依險自固信開溝洩水

張良城

縣東南十三里今名張良村南有牧馬場西南有

飲馬川

婁室城

縣東一十八里金將婁室所築舊址尙存

虞城

縣北二十里大坊村

相城

咎繇之後為理氏商末里證孫仲師遭難去王姓

里至晉里克被戮克妻司城氏挾其少子季友逃於安邑之相城因爲相里氏今相鎮猶呼相里亦曰相城

龍池宮

唐開元八年建居民禱雨輒應今潭上故址猶存唐曲環里

陳許節度使晉昌郡王曲環舊居在報國寺北故名其里曰寺北曲至今猶爲邑中大姓族人別居者曰大曲小曲今寺移村內舊寺廢爲僧田

昆吾亭

解州全志

卷之十一

安邑縣

古蹟

三

帝王世紀湯伐桀戰昆吾亭

根倉 涇倉

漢志在河東郡

象壁石

在縣治儀門左嵌之於壁非近代物也相傳訟者觸之則不得直

靜明洞

明曹真子棲此

王右軍鹽池碑記

在運城察院西詳見運志

鹽風亭 彈琴臺

俱在鹽池詳運志

寺觀附

太平興國寺

在城內東北內有塔十三層高二百六十尺基廣  
畝餘盡以甃甃唐正觀間建嘉靖乙卯地震從頂  
裂至七層寬尺許至萬歷間地震復合殆不可測  
觀音寺

在縣西王曲村金太和四年建卽羊馱寺鄉人掘  
地得石人騎羊僉以爲菩薩象因創寺祀之

解州全志

卷之十一

安邑縣

古蹟

四

宏敬寺

在縣西門外元至正十二年建今廢

壽聖寺

在北相鎮

報國寺

在寺北曲內有泛舟禪師塔師邠王守禮也

大覺寺

在陶村

大雲寺

在鳴條岡虞舜陵側內有古栢胥大可十圍舊志

稱寺以守陵

長春觀

在縣治東元至治間建

集仙觀

在陳璧村唐景雲間建名景雲宮元改今名

林墓附

虞舜陵

在縣城西北三十里鳴條岡之陽孟子謂舜卒於鳴條卽此陵高三尺甃以甃古栢皆大可十餘圍東南有守陵大雲寺按四址南北長一百六十四

解州全志

卷之十一

安邑縣 古蹟

五

步東西廣五十七步計地七十畝陵前神道寬廣七丈二尺計地十三畝又灘地八十七畝爲奉祀香火

夏關龍逢墓

在縣東北二里玉鈞山按河南靈寶縣亦有大夫墓當以安邑爲正

周段干木墓

在上段村按芮城縣北十五里有段干木墓在安邑者或係後人追思所築云

陶朱公墓

在陶村西相傳范蠡歸齊相印懷其重寶間行至  
此陶村卽其所居也

杜康墓

在中杜村

漢尙方令蔡倫墓

在張董村相傳倫寓居本縣卒葬於此

晉太保衛瓘墓

在王范村

太子洗馬衛玠墓

在瓘墓西

解州全志

卷之十一

安邑縣

古蹟

六

明太常寺卿張芮墓

在運城西北勅建

遼東巡撫張岫墓

在運城西北

工部尙書楊一魁墓

在運城東五里

左都御史曹于汴墓

在運城西北五里

少保劉敏寬墓

在運城東五里

巡撫都御史胡志夔墓

在運城西南五里

四川按察使姚誠立墓

在運城西五里杜家村東

江西按察使康四海墓

在運城西杜家村西南

南陽知府謝傳顯墓

在運城東七里岡

國朝禮部左侍郎呂崇烈墓

在運城西南二里

解州全志

卷之十一

安邑縣

古蹟

七

內閣學士王尹方墓

在運城東北三里

雲南道御史王國楠墓

在運城北喬家莊

鑾儀衛使劉永灝墓

在運城東七里岡北

漏澤園二

一在縣城西門外一在南門外

祥異

漢建寧四年地裂深不見底

晉建興元年天雨肉

宋大中祥符九年七月蝗

天禧元年二月蝗蝻復生

慶歷三年地震

宣和七年地震裂數十丈

元至元二十四年二麥枯

明成化二十年大旱

宏治十年鹽盛生積如山阜

解州全志

卷之十一

安邑縣

祥異

八

嘉靖七年大旱無禾 十一年復大旱餓殍枕籍

三十二年鹽花盛生時監臨尙公維持晝夜住野狐

泉催督有方躬巡泥水中丁夫奮躍課足十年 三

十四年地大震城垣廬舍傾覆過半居民壓死者甚

多 三十五年黑靑傷人疾忽如風雖密室無不至

至則人皆昏迷被傷卽出黃水遍地驚擾夜必張燈

持刃金鼓防之

隆慶四年夏五月大水衝決鹽池本縣西城門漂入

解州境

萬歷十四年大疫頭項腫死亡相望 十六年大稔



石麥三百錢 十九年小蝦蟆盈野行者幾無駐足處八月久雨敗屋 二十二年多蟻蝻行者亦幾無駐足處 二十五年八月中池塘水潮如鼎沸 二十八年池鹽盛生 三十九年大疫體發斑疹死者不可勝數 四十一年大旱 四十三年夏四月八日大雨雹傷麥二十一日復雨雹 四十四年飛蝗蔽天復生蝻禾稼立盡七月大雷震電 四十五年蝗蝻仍爲害 四十六年有年然大疫死亡相繼 天啟元年大有年

崇正五年七月大雨三旬害稼敗屋水決鹽池 六

解州全志

卷之十一

安邑縣 祥異

九

年秋大旱 八年旱月赤如血 九年正月壬申癸酉大風甲戌震電乙亥雨雪夏大旱 十一年七月蝗飛翳天傷禾十二月地震 十二年四月地震六月蝗蝻大傷禾稼自九年不雨至十三年七月 十三年二月隕霜殺桑麥枯秋無禾斗米九錢人相食死者無算 十四年四月斗米一兩一錢死亡相繼 十五年六月地大震從西北起聲如雷官民舍俱傾數十日方止 十七年三月日生幻影如四日八月天鼓鳴

國朝順治二年大旱自三月不雨至七月 四年大雨

水多蝦蟆蝗不爲災有年 五年大雨水鹽池被害  
大有年 六年三月大風拔木運城無故崩數十丈  
八月星隕火光如斗聲如雷 七年自七月十二日  
大雨至八月初十日止禾傷屋倒 十二年四月條  
山有積雪自四月不雨至七月

康熙元年八月大雨如注者半月牆屋傾圮強半人  
多僦居廟宇 三年秋八月二十二日地震冬十二  
月又連震二次 六年三月二十六日大雪 七年  
六月十七日地震 十年夏大熱民多疫病秋田生  
黑蟲如蠶食穀葉 十八年秋霖浹旬水決鹽池

三十年秋飛蝗蔽天禾立盡 三十一年大飢死者  
相枕籍瘟疫盛行 三十二年大有麥 三十四年  
四月地震如雷 五十六年池鹽盛生阜次岡連  
五十九年大旱無禾 六十年無麥民多流徙秋大  
稔

雍正五年池鹽不種自生獲七百萬觔有奇 七年  
安邑民馮維明妻薛氏一產三男

乾隆元年大有年 三年十一月地震 十二年五  
月初七日天鼓鳴秋旱無禾 十三年大旱無麥  
十六年自閏五月至七月中旬雨水連綿河漲人有

傷者 十七年旱無禾 十八年大有年 十九年  
有年 二十年有年 二十一年麥稔自七月初旬  
雨至九月中止平地出泉鹽池被水 二十四年秋  
大旱無禾 二十五年麥大稔

解州全志

卷之十一

安邑縣

祥異

十一